

Sing vooraf staande: Psalm 100:1, 3 (p.)

- 1 Juig, al wat leef, juig voor die HEER! / Dien God met blydschap, gee Hom eer;
kom nader voor sy aangesig, / en prys Hom met 'n lofgedig!
- 3 Gaan deur sy poorte in met lof, / met lofsang in sy tempelhof;
kom in sy huis, o bondsvolk, saam; / verhef sy lof en prys sy Naam.

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die
kragtige werking van God die Heilige Gees.

Amen.

Lofpsalm 47:4 (p. 241)

- 4 Psalmsing tot Gods eer! Weet dat Hy regeer. / Hy het opgevaar, Koning is Hy daar
van die heidendom. Vorste en volke kom / om sy volk te wees, Abrams God te vrees.
Skild en teëweer is van U, o HEER! / Sing dan juublend bly! Hoog verhewe is Hy!

Geloofsbelydenis: Apostolicum

Na die wet sing ons Psalm 18:11 (p.)

Wet

Psalm 18:11 (p. 75)

- 11 Sy ordening, dié was voor my, / ek het sy woord getrou gebly.
Ek was opreg van hart voor Hom / en wou op onregspad nie kom;
sodat die HEER, sy trou tot prys, / en na die reinheid van my hand,
sy woord gegee het as my pand / en my my reg het toegewys.

Gebed

- *Doksologie:*
 - *Aanbidding:*
 - *Skuldbelydenis:*
 - *Vergifnis:*
 - *Dank:*
 - *Smeking vir die nood van die gemeente en voorbidding vir die kerk,
owerhede en sondige wêreld, asook die beroep op die beloftes van God:*
 - *Algemene bede:*
 - *Verligting van die Gees ter wille van die Woorddiens:*
- Amen.

Psalm 20:2 (p. 91)

- 2 Mag Hy sy heil en bystand stuur / uit hoë heiligdom,
en u uit Sion ondersteun, / van waar u hulp sal kom.

Skriflesing: 1 Tessalonisense 5

Teks: 1 Tessalonisense 5:11

**Daarom, bemoedig mekaar en bou die een die ander op, soos julle ook
doen.** (1 Tessalonisense 5:11 AFR53)

Is dit nie dalk waar dat baie van die sondes wat gebeur, te wyte is aan die vereensaming
van mense nie?

- In hierdie gedeelte onderstreep die Here die gemeenskap van die heiliges met mekaar.
- Die klem lê daarop dat ons as gelowiges onder alle omstandighede mekaar se hande moet vat en mekaar moet bemoedig en positief maak.

Ons moet let op die volgende dinge:

1. **Wat gebeur op die dag van die Here?**
2. **Sal die gelowiges die spanning om te wag kan volhou?**
3. **Wat moet ons gemeente doen?**

1. Wat gebeur op die dag van die Here?

Daar was 'n bepaalde ongeduld by die Christene van Tessalonisense, want hulle kon nie wag dat die Here moes kom nie. Daar was 'n paar oorsake.

- Een van die oorsake was die druk van die vervolging teen hulle omdat hulle Christene was.
- Die verdrukking was vir hulle 'n swaar moeite om mee saam te lewe, daarom wou hulle graag sien hoe die Here hulle reg teenoor hulle vervolgers in die reine bring.

Natuurlik is hulle ingesteldheid op *die dag van die Here* nie reg nie. Daarom bring die Here nou 'n korreksie op hulle siening aan.

- *Die dag van die Here* is nie net 'n dag van wraak nie; dit is ook 'n dag waarnatoe die gemeente van die Here met vreugde moet lewe.
- Die gemeente moes as 'n eenheid in Christus na hierdie dag toe leef.

Dit was ook nie 'n geval dat die gemeente van Tessalonika dit nie geweet het nie.

- Hulle het uit die Ou Testament heeltemal goed verstaan wat alles gaan gebeur wanneer die Here kom.
- In die Ou Testament word hierdie dag altyd die **dag van die Here** genoem. Daarom word dit spesifiek hier ook so genoem. Dit is ook waarna Paulus verwys as hy sê dat hy nie nodig het om vir hulle oor die tye en geleenthede te skryf nie. Dit is spesifiek die tye en geleenthede voor die wederkoms van die Here.

Wat het hulle van die dag van die Here geweet?

- Op hierdie dag gaan die Here sy heil en heerlijkheid openbaar.
- Dit gaan onder andere gebeur omdat die Here sy straf oor sy (en sy gelowiges se) vyande gaan voltrek.
- Die dag van die Here beteken ook dat die kerkvolk self uitgesif gaan word omdat die oordeel van die Here oor hulle ook gaan brand.
- Verder verskyn die Messias ook nog op daardie dag (vergelyk Amos 5:18; 8:4; Miga 4:6; 7:1; Joel 1:15; 2:1; Sefanja 1:7).

In die Nuwe-Testamentiese openbaring word openbaar dat die heerlijkheid en majesteit van die Here Jesus Christus aan die lig sal tree.

Die feit dat die apostel skryf dat hulle baie goed weet, wys dat hulle 'n baie noukeurige kennis gehad het.

- Maar dit wys ook dat hulle die geloofsvermoë gehad het om nie te verdwaal of te verval in allerhande sinnelose dinge soos dwaalleer of sektarismes nie.
- Verder beteken dit ook dat hulle mekaar kon vashou in die geloof deur mekaar te bemoedig.

2. Sal die gelowiges die spanning om te wag kan volhou?

Die oomblik van die wederkoms is senutergend vir die wat daarop wag.

- Dit kom soos 'n skelm onverhoeds.
- Daarby is daar nog die gevoel dat die koms van die dag ook iets gevaarliks in hom inhou, want dit kan kom soos 'n vyand.

Sommiges van die gelowiges gaan moedeloos word.

- Daarom is dit so noodsaaklik dat ons mekaar se hande moet vashou en mekaar bemoedig want die ware gelowiges sal in die tyd baie baie beslis druk en stres beleef (vergelyk Lukas 12:35 – 48; Lukas 16:27, 28vv; Matteus 24:36, 37, 42, 50).

Die gelowiges hoef nie hierdie angsgevoel te ervaar nie, want die dag van die Here bring vir hulle vrede en veiligheid.

- Dit staan teenoor die vrede en veiligheid wat deur valse gelowiges geloop en propageer word (Jeremia 6:14; 8:11; Lukas 21:34; Psalm 48:6; Hosea 13:13; Miga 4:9; Nahum 2:10; Jesaja 13:8, 21:3).
- Die angs en die nood van die ongelowiges word beskryf in vers 3, maar dit word onmiddellik opgevolg met 'n skerp kontras wat die toestand van die gelowiges beskryf. Die ware gelowiges moet mekaar voortdurend daaraan herinner dat hulle nie soos die ongelowiges in die donker van die oordeel van die Here lewe nie. Hulle lewe in die lig.

Let op na die reeks woorde wat as kontraste met mekaar gebruik word:

- nag/dag
- lig/donker
- wakker wees/slaap
- nugter wees/dronk wees

Dit is nie sonder rede nie, want daarmee vertel die Bybel die hele tyd vir ons aan watter kant van die Here se raad ons staan.

- Die Bybel gee aan ons die seker wete dat ons verlos is sodat ons moedig kan lewe en mekaar ook kan bemoedig.
- Ons lidmate word deur die Here bemoedig: Moenie in vrees vir die wederkoms lewe nie, want julle weet mos dat julle lewens nie in die donker is nie.
- Julle lewe in die lig. Anders gesê: Julle lewe nie in gevaar en die verskrikking van die dag van die Here nie.

Hiermee saam is daar 'n aansporing:

laat ons dan nie slaap nie ... (1 Tessalonisense 5:6a AFR53)

Dit is weer die kontras wat na vore tree:

- Die ander slaap en hulle is nie op hulle hoede nie.
- Ons verskil van hulle en ons is op ons hoede.
- Ons verwag die wederkoms van die Here en ons moedig mekaar aan in hierdie wagproses.

Die Here gebruik nog meer beskrywings om dit te bevestig. Kyk byvoorbeeld na die lyn wat die woorde *nugter* en *dronk* trek.

- Die gelowiges is juis uit al hierdie dinge uitgeroep.

By al die ander beelde (nag/lic, ens) kom hier nou 'n nuwe ene by: Trek aan!

- Moenie kaal loop nie.
- Trek 'n borswapen aan, en sit 'n helm op.
- Ons moet klere aantrek maar nie gewone klere nie – ons moet gevegsdrag aantrek.

Die feit dat ons gevegsklere moet aantrek, beteken dat ons weet van die stryd.

- Maar dadelik kom die gemeenskap van die heiliges in ons gesigsveld.
- Een man alleen kan nie 'n oorlog maak nie; hy het baie manne nodig wat saam met hom veg.

Dit bring ons net weer terug by ons teksvers, naamlik dat ons mekaar moet bemoedig.

- Die Here wys ons daarop dat al hierdie dinge waarin ons deel juis die positiewe effek het dat ons die borswapen van geloof en liefde moet aantrek.
- Dit behels ook wedersydse bemoediging van gelowiges met mekaar.

Uiteraard beteken dit dat ons as 'n groep voor die Here staan, want een soldaat alleen trek nie sy gevegstrag aan en gaan alleen oorlog toe nie.

- Die hele gemeente word dus opgeskerp om soos een man met moed en in hoop te veg teen die duiwel se aanvalle teen ons.
- Let op na kleredrag wat die Here voorskryf: *die helm van hoop op die saligheid* (vergelyk hierdie gedeelte met Efesiërs 6:13vv waar die volle wapenrusting beskryf word).

Dit beteken dat die wederkoms van Christus vir ons die belofte van volkome verlossing inhou.

- Ons wag dus vir die dag van die Here omdat dit ook die opstanding van die liggaam inhou.
- Ons moet dit ook voortdurend vir mekaar sê, wat in al hierdie dinge lê die vastigheid waarop ons bou om deur elke dag te kom.

Die groot saak waarvoor alles gaan, is die bestemming waarheen ons op pad is. Dit is waarvoor ons moet veg, waarop ons moet hoop en waarvoor ons nugter moet wees.

- Die dag van die Here is 'n dag van vrees en verskrikking vir die ongelowiges.
- Maar die gelowiges moet altyd in gedagte hou dat hulle nie deur die Here bedoel word vir toorn nie, maar vir saligheid.

Die hele saak waarvoor dit gaan is dat die Here aan ons bevestig dat ons sy besondere eiendom is.

- Die grond daarvoor dat ons die eiendom van God is, lê in die werk van die Here Jesus Christus:
- Hy het vir ons gesterf, sodat ons ... saam met Hom kan lewe.

Gewoonlik word die opstanding van die Here saam met sy dood vermeld (vergelyk 1 Tessalonisense 4:4; 1 Korintiërs 15:3; Romeine 4:25; 6:3vv; 7:4).

- Die doel van die Here se dood en opstanding is dus dat ons saam met Hom sal lewe.
- Hou nou die hele tyd die opvatting van die dag van die Here in gedagte, naamlik dat dit 'n dag van oordeel en vernietiging sal wees.

Die woorde *of ons wakker is en of ons slaap*, word waarskynlik in 'n oordragtelike betekenis gebruik, naamlik of ons lewe en of ons in die doodslaap is (dieselfde woord vir *slaap* word gebruik in Markus 5:39:

En toe Hy binnegaan, sê Hy vir hulle: Waarom gaan julle so te kere en ween julle? Die kind is nie dood nie, maar slaap. (Markus 5:39 AFR53)

Vergelyk ook Daniël 12:2:

En baie van die wat in die stof van die aarde slaap, sal ontwaak, sommige tot die ewige lewe en sommige tot groot smaadheid, vir ewig afgrylik.

(Daniël 12:2 AFR53)

en Psalm 88:6:

vrygelaat onder die dooies, soos die wat verslaan is, wat in die graf lê, aan wie U nie meer dink nie, en wat afgesny is van u hand.(Psalm 88:6 AFR53)

- Die betekenis van die feit dat ons in die lewe en in die lewe na die dood aan God behoort, is van sulke kardinale belang dat die gelowiges opgewek word om dit as 'n onderlinge aansporing te gebruik: Bemoedig mekaar.
- Die gelowiges moet mekaar vermaan en mekaar stig.

3. Wat moet ons gemeente doen?

Gesien teen 1 Tessalonisense 5 is dit noodsaaklik vir ons almal om in die geloof nader na mekaar toe te beweeg.

- Die gevolg kan net goed wees, want dan kom ons tot mekaar se beskikking om mekaar op te bou en te bemoedig, soos wat dit in ons teksvers staan.
- Die gemeenskap van die heiliges is lewensnoodsaaklik, want enige mens kan hierdie dinge verloor, en dan verloor ons daarmee saam ons gehoorsaamheid en verantwoordelikheid aan die Here.
- Dit kan ons so verarm en laat veragter in die geloof, dat ons heeltemal uit die kring van ons medegelowiges wegraak.

Die vraag waarop ons elkeen vandag moet antwoord is dit: Wat moet ek as lidmaat doen om te doen wat die Here hier sê? Hoe kan ek ander bemoedig en self ook bemoedig word?

- Ek moet die volle waarheid van my verlossing in die Here Jesus Christus beseef. En ek moet beseef dat die een deel daarvan, naamlik die gemeenskap van die heiliges, nou al in die gemeente waaraan ek behoort, waar gemaak word.
- Ek moet deel wees van die vervulling daarvan.

Al die verkeerde aspekte wat hierdie waarheid kan verdraai, lê in die donker en ongeloof en gebrek aan behoefte om met mekaar saam te leef.

- Enige een van ons kan so in onself verstrengel raak dat ons gemeenskaplike beseef en belewenis van waaroor dit alles gaan, kan wegraak.
- Dit kan uiteindelik heeltemal ontbreek.

Ons moet wakker wees – anders is ons onbewus van die volheid van die wederkoms.

- Ons kan so onbewus wees dat ons werklik aan die slaap is – terwyl die Here hier sê dat ons mekaar moet wakker hou.
- Ons moet dus nie net self wakker wees nie. Ons moet ook die ander gelowiges wakker hou.

Letterlik staan daar in die Grieks dat ons mekaar moet toeroep, en tuismaak in die verlossing totdat ons 'n eenheid in Jesus Christus is. Kom ons streef daarna.

Kom elkeen van ons soek maniere om meer en meer met mekaar as gelowiges betrokke te raak sodat ons mekaar kan aanspoor om 'n soliede eenheid te wees in die bloed van Jesus Christus.

Amen.

Slotgebed

Slotpsalm 98:4 (p. 489)

- 4 Laat al die strome nou die hande / in jubel saamklap van omlaag;
laat die gebergtes langs hul wande / die juigtoon altyd verder draag!
Hy kom, die Regter van die volke, / omstraal deur reg en majesteit;
Hy span sy vierskaar in die wolke / en oordeel in regmatigheid.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Hulpdienspredikant
Gereformeerde Kerk Clanwilliam
Datum: 21 April 2013